



Guru Sekolah Menengah Kebangsaan Sandakan Siti Syuhada Sadiman mengambil bacaan suhu badan pelajar tingkatan lima Mohammad Izzueddin Amirhamza (kiri) yang mendaftar masuk ke asrama sekolah itu pada 23 Jun 2020. Foto BERNAMA

KPM lantik lebih 18,000 guru baharu mulai Julai

by Mustakim Ramli Jun 20, 2021 **11:53 am**

SHAH ALAM, 20 JUN: Kementerian Pendidikan Malaysia (KPM) akan membuat pengambilan khas guru gred DG41 secara besar-besaran membabitkan 18,702 orang mulai 7 Julai.

Menteri Kanannya Datuk Dr Radzi Jidin berkata kaedah itu bagi mengatasi masalah kekurangan guru selain memberi peluang graduan memperoleh pekerjaan.

Beliau berkata penempatan mereka yang layak pula akan dibuat secara berperingkat bermula Oktober.

“Kita akan bekerjasama dengan SPP (Suruhanjaya Perkhidmatan Pendidikan) bagi memastikan pengambilan ini berjalan lancar dan teratur,” katanya pada sidang media hari ini.

Dr Radzi berkata Sabah, Sarawak, Selangor dan Johor diberi keutamaan berikutan keempat-empat negeri tersebut berdepan masalah kekurangan guru paling kritikal ketika ini.

Beliau menambah mata pelajaran yang kurang guru ialah bahasa inggeris, sejarah, pendidikan khas, pendidikan islam dan teknologi maklumat dan komunikasi bagi sekolah rendah.

Manakala, bagi sekolah menengah pula ialah bahasa melayu, bahasa inggeris, pendidikan khas, pendidikan islam dan reka bentuk dan teknologi.